



O'ZBEKISTON RESPUBLIKASI VAZIRLAR MAHKAMASINING QARORI

20 23 yil « 20 » noyabr № 608

Toshkent sh.

“Йилнинг энг намунали маҳалла ёшлар етакчиси” танловини ташkil этиш чора-тадбирлари тўғрисида

Ўзбекистон Республикаси Президентининг “2022–2026 йилларга мўлжалланган Янги Ўзбекистоннинг тараққиёт стратегиясини “Инсонга эътибор ва сифатли таълим йили”да амалга оширишга оид давлат дастури тўғрисида” 2023 йил 28 февралдаги ПФ–27-сон Фармони ижросини таъминлаш мақсадида Вазирлар Маҳкамаси қарор қилади:

1. Ўзбекистон Республикаси Президентининг 2023 йил 28 февралдаги ПФ–27-сон Фармони билан тасдиқланган 2022–2026 йилларга мўлжалланган Янги Ўзбекистоннинг тараққиёт стратегиясини “Инсонга эътибор ва сифатли таълим йили”да амалга оширишга оид давлат дастурининг 219-бандида маҳаллалардаги ёшлар етакчилари ўртасида “Йилнинг энг намунали маҳалла ёшлар етакчиси” танловини (кейинги ўринларда – танлов) ташkil этиш белгиланганлиги маълумот учун қабул қилинсин.

2. Қуйидагилар:

“Йилнинг энг намунали маҳалла ёшлар етакчиси” танловини ташkil этиш ва ўтказиш тартиби тўғрисидаги низом **1-иловага** мувофиқ;

“Йилнинг энг намунали маҳалла ёшлар етакчиси” танлови ташкилий қўмитасининг (кейинги ўринларда – Ташкилий қўмита) таркиби **2-иловага** мувофиқ;

“Йилнинг энг намунали маҳалла ёшлар етакчиси” танловининг туман (шаҳар) ва ҳудудий бошқичларини ташkil этиш ва ўтказиш бўйича комиссияларнинг намунавий таркиблари (кейинги ўринларда – комиссия) тегишлича **3** ва **3а-иловаларга** мувофиқ тасдиқлансин.

Қорақалпоғистон Республикаси, вилоятлар ва Тошкент шаҳар ёшлар ишлари бошқармалари ушбу қарор билан тасдиқланган намунавий таркибларга мувофиқ **ўн беш кун муддатда** танловнинг туман (шаҳар) ва ҳудудий бошқичларини ташkil этиш ва ўтказиш бўйича тегишли комиссиялар таркибларини тасдиқласин.

3. Ташкилий қўмита (Икрамов):

ўн кун муддатда ушбу қарор билан тасдиқланган Низом талаблари асосида маҳалла ёшлар етакчиларини ҳар бир йўналиш бўйича баҳолаш мезонларини ишлаб чиқсин ва тасдиқласин;

танловнинг республика босқичи ғолиблари ва совриндорларини тақдирлаш, шу жумладан, моддий рағбатлантириш масаласини ҳал этсин;

танловни ўтказиш билан боғлиқ тадбирларга вазирликлар ва идоралар, бошқа давлат ташкилотлари вакилларини, оммавий ахборот воситалари ҳамда кенг жамоатчиликни жалб этиш, маҳалладаги ёшлар етакчиларининг танловга бўлган қизиқишини кучайтириш, тадбирни кўтаринки руҳда ўтказиш учун зарур бўлган чора-тадбирларни амалга оширсин.

Ташкилий қўмитага танловнинг адолатли ва шаффоф ўтказилиши, шунингдек, номзодларнинг холисона аниқланиши ва қўйиладиган талабларга мувофиқлиги юзасидан жавобгарлик юклансин.

4. Белгилансинки:

танлов ҳар йили **туман (шаҳар), ҳудудий** саралаш ва **республика** финал босқичларида ташкил этилади;

танлов маҳалладаги ёшлар етакчиси лавозимида камида битта маҳаллада **олти ой давомида** фаолият юритаётган, **амалий иш тажрибасига эга** маҳалладаги ёшлар етакчилари ўртасида ўтказилади;

танловнинг республика босқичи ғолиблари **“Маҳалла ифтихори”** кўкрак нишони билан тақдирлашга тавсия этилади.

5. Ёшлар ишлари агентлиги:

танловнинг юқори даражада ташкил этилиши ва ўтказилиши бўйича Ташкилий қўмитанинг ишчи органини ташкил этсин;

танлов ғолиблари ва совриндорларини тақдирлаш, шу жумладан, моддий рағбатлантириш, шунингдек, танловни ташкил этиш ва ўтказиш билан боғлиқ бошқа харажатларни Давлат бюджетидан Ёшлар ишлари агентлигининг Ёшларга оид давлат сиёсатини қўллаб-қувватлаш жамғармасига ажратилган маблағлар ҳисобидан қопланишини таъминласин;

танлов ғолибларининг ўз хизмат вазифаларини бажариш жараёни ва эришган ютуқларини оммавий ахборот воситалари, Интернет жаҳон ахборот тармоғи орқали кенг тарғиб этсин;

6. Ёшлар сиёсати ва спорт вазирлиги Иқтисодиёт ва молия вазирлиги билан биргаликда танлов ғолиблари ва совриндорларини тақдирлаш, уларга тўланадиган моддий рағбатлантириш маблағлари, шунингдек, танловни ташкил этиш ва ўтказиш билан боғлиқ бошқа харажатлар учун зарур маблағларни **2024 йилги Давлат бюджети параметрларида** Ёшлар ишлари агентлиги учун назарда тутилган маблағлар доирасида ажратилишини таъминласин.

7. Ўзбекистон Миллий телерадиокомпанияси, Ўзбекистон Миллий ахборот агентлиги ва бошқа оммавий ахборот воситаларига ушбу қарорнинг ижроси билан боғлиқ тадбирларни кенг ёритиш тавсия этилсин.

8. Ёшлар сиёсати ва спорт вазирлиги манфаатдор вазирлик ва идоралар билан биргаликда ўзлари қабул қилган норматив-ҳуқуқий ҳужжатларни **икки ой муддатда** ушбу қарорга мувофиқлаштирсин.

9. Мазкур қарорнинг бажарилишини назорат қилиш Ўзбекистон Республикаси ёшлар сиёсати ва спорт вазири А.И. Икрамов зиммасига юклансин.

**Ўзбекистон Республикасининг
Бош вазири**



А. Арипов

Вазирлар Маҳкамасининг
2023 йил “20” ноябрдаги 608-сон қарорига
1-илова

**“Йилнинг энг намунали маҳалла ёшлар етакчиси” танловини
ташқил этиш ва ўтказиш тартиби тўғрисида
НИЗОМ**

1-боб. Умумий қоидалар

1. Мазкур Низом “Йилнинг энг намунали маҳалла ёшлар етакчиси” танловини (кейинги ўринларда – танлов) ташқил этиш ва ўтказиш тартибини белгилайди.

2. Танлов маҳалладаги ёшлар етакчиси лавозимида камида битта маҳаллада **олти ой давомида** фаолият юритаётган, амалий иш тажрибасига эга маҳалладаги ёшлар етакчилари (кейинги ўринларда – етакчи) ўртасида ўтказилади.

3. Танлов қуйидаги йўналишлар бўйича ўтказилади:

““Ёшлар баланси” тизими асосида самарали иш ташқил этган энг намунали маҳалла етакчиси” йўналиши;

““Ёшлар дафтари” тизими асосида самарали иш ташқил этган энг намунали маҳалла етакчиси” йўналиши;

“Ёшларнинг бўш вақтини самарали ташқил этган энг намунали маҳалла етакчиси” йўналиши;

“Алоҳида эътиборга муҳтож ёшлар билан самарали ишлаган энг намунали маҳалла етакчиси” йўналиши;

“Ёшларнинг тадбиркорлик ғояларини амалга оширишда ва бандлигини таъминлашда самарали кўмаклашган энг намунали маҳалла етакчиси” йўналиши;

“Ташқи меҳнат миграциясидан қайтган ёшлар билан самарали ишлаган энг намунали маҳалла етакчиси” йўналиши;

“Хуқуқбузарлик содир этишга мойиллиги бўлган ва жазони ижро этиш муассасаларидан озод қилинган ёшлар билан тизимли ишлаган энг намунали маҳалла етакчиси” йўналиши;

“Иқтидорли ва интеллектуал фаол ёшлар билан самарали ишлаган энг намунали маҳалла етакчиси” йўналиши;

“Касб-ҳунарлар танловини юқори савияда ташқил этган энг намунали маҳалла етакчиси” йўналиши;

“Ёшларга соғлом турмуш тарзини тарғиб қилган ва спорт мусобақаларини юқори савияда ташқил этган энг намунали маҳалла етакчиси” йўналиши.

“Хукуқбузарлик содир этишга мойиллиги бўлган ва жазони ижро этиш муассасаларидан озод қилинган ёшлар билан тизимли ишлаган энг намунали маҳалла етакчиси” йўналиши бўйича танловда ички ишлар органлари томонидан **ёшлар жиноятчилиги ўтган даврдагига нисбатан жорий йилда камайган** деб топилган маҳалла етакчилари қатнашади.

4. Танловнинг мақсади қуйидагилардан иборат:

етакчилар онги, қалбида “Ватанга ва халққа садоқат билан хизмат қилиш – олий бурчимиз!” ғоясини мустаҳкамлаш, уларда ватанпарварлик ҳамда юрт тақдирига дахлдорлик туйғусини кучайтириш;

улар ўртасида соғлом рақобат муҳитини шакллантириш, интеллектуал ва профессионал салоҳиятни ошириш ҳамда бу борадаги фаолиятни қўллаб-қувватлаш, шунингдек, ташаббускорлик ва етакчилик фазилатларини ривожлантириш;

ўзининг шахсий фазилатлари билан ёшларга намуна бўлаётган етакчиларни рағбатлантириш;

юксак билимли, профессионал касбий маҳоратга эга бўлган истеъдодли ёш кадрларни аниқлаш ва раҳбарлик лавозимларига тайинлаш ҳамда кадрлар захирасини шакллантириш.

5. Танлов Ўзбекистон Республикаси Ёшлар сиёсати ва спорт вазирлиги ҳузуридаги Ёшлар ишлари агентлиги (кейинги ўринларда – Агентлик) томонидан манфаатдор вазирлик ва идоралар билан ҳамкорликда ташкил этилади.

6. Танлов мазкур Низомга иловадаги схемага мувофиқ ўтказилади.

2-боб. Танловни ташкил этиш ва ўтказиш тартиби

1-§. Танловни ташкил этиш ва ўтказишнинг умумий талаблари

7. “Йилнинг энг намунали маҳалла ёшлар етакчиси” танловининг ташкилий қўмитаси (кейинги ўринларда – Ташкилий қўмита) танловни ўтказиш билан боғлиқ чора-тадбирларни амалга оширади ва танлов иштирокчиларини баҳолаш тартибини тасдиқлайди.

Танловнинг:

туман (шаҳар) ва ҳудудий саралаш босқичлари – тегишлича “Йилнинг энг намунали маҳалла ёшлар етакчиси” танловининг туман (шаҳар) ва ҳудудий босқичларини ташкил этиш ва ўтказиш бўйича комиссиялар томонидан;

республика финал босқичи – Ташкилий қўмита томонидан ўтказилади.

“Йилнинг энг намунали маҳалла ёшлар етакчиси” танловининг туман (шаҳар) ва ҳудудий босқичларини ташкил этиш ва ўтказиш бўйича комиссиялар таркиби Қорақалпоғистон Республикаси, вилоятлар ва Тошкент шаҳар ёшлар ишлари бошқармалари томонидан тасдиқланади.

8. Ташкилий кўмита томонидан **ҳар йили 5 сентябрга** қадар Агентликнинг расмий веб-сайти ва ижтимоий тармоқлардаги саҳифаларида танлов ўтказилиши тўғрисида эълон берилади.

9. Танловда иштирок этиш учун номзодлар Агентликнинг расмий веб-сайти ёки ижтимоий тармоқлардаги саҳифалари орқали рўйхатдан ўтади.

10. Рўйхатдан ўтиш **ҳар йили 5 сентябрда бошланиб, 30 сентябрь куни яқунланади** ва рўйхатдан ўтган номзодлар ҳақидаги барча маълумотлар Ташкилий кўмита томонидан **уч иш кунида** Қорақалпоғистон Республикаси, вилоятлар ва Тошкент шаҳар ёшлар ишлари бошқармаларига танловни ташкил этиш учун юборилади.

11. Танловда иштирок этиш учун етакчиларнинг бошқача тарзда рўйхатдан ўтишига ёки саралаш босқичида иштирок этмасдан кейинги босқичда иштирок этишига йўл қўйилмайди.

12. Танлов **ҳар йили октябрь – декабрь ойларида** қуйидаги босқичларда ўтказилади:

туман (шаҳар) саралаш босқичи – октябрь ойида етакчилар ўртасида туман (шаҳар) миқёсида;

худудий саралаш босқичи – ноябрь ойида туман (шаҳар) саралаш босқичида ғолиб бўлган етакчилар ўртасида худудий миқёсда;

республика финал босқичи – декабрь ойининг биринчи ўн кунлигида худудий саралаш босқичида ғолиб бўлган етакчилар ўртасида республика миқёсида.

2-§. Танлов йўналишлари ва баҳолаш тартиби

13. Барча йўналишлар бўйича танловда иштирок этувчилар ўз фаолиятини амалга оширган ишларини кўрсатиб берувчи тегишли маълумотлар, альбом ҳамда давомийлиги **беш дақиқадан** ошмайдиган видеоролик орқали намойиш этади ва изоҳлайди.

Шунингдек, барча йўналишларда иштирок этган етакчилар маҳаллада ёшлар етакчиси бўлиб фаолият бошлагандан кейин ўз устида ишлаб, шахсий ривожланишида кўрсатган натижасига (давлат мукофоти, кўкрак нишони, мақолалари, спорт ютуқлари, танлов ва мусобақалардаги иштироки, тилни билиш сертификати ва бошқалар) қуйидаги тартибда устуворлик берилади:

худудий даражадаги ҳар бир ютуқ учун – 1 балл;

республика дажасидаги ҳар бир ютуқ учун – 2 балл;

халқаро дажадаги ҳар бир ютуқ учун – 3 балл.

Бунда етакчилар эришган ютуқлари акс этган маълумотлар ва ҳужжатларни тақдим этади ҳамда электрон (фото, видео шаклида) шаклда шарҳлаб беради, берилган маълумот ва ҳужжатларнинг ҳақиқийлиги учун уларни тақдим этган талабгор шахсан жавобгар бўлади.

14. Танловнинг туман (шаҳар), ҳудудий саралаш ва республика финал босқичлари иштирокчилари тўплаган баллари тегишли комиссиялар томонидан ҳисобланади.

15. Танлов етакчилари ўзаро тенг ҳуқуқли бўлиб, ушбу Низомдан ташқари бошқа устунлик ёки имтиёзлар белгиланишига йўл қўйилмайди.

16. Танлов оммавий ахборот воситалари ва кенг жамоатчилик вакиллари кузатуви остида ошкоралик тамойили асосида ўтказилади.

3-§. Танловнинг туман (шаҳар), ҳудудий саралаш ва республика финал босқичларини ўтказиш тартиби

17. Танловнинг туман (шаҳар), ҳудудий саралаш ва республика финал босқичларида етакчиларнинг тўплаган баллари кўшилиб, ҳар бир иштирокчининг якуний тўплаган балли эълон қилинади.

Танлов ғолиблари баллар йиғиндиси якуни бўйича аниқланади.

18. Икки ва ундан ортиқ етакчининг тўплаган якуний баллари тенг бўлган ҳолларда, маҳаллада ёшлар етакчиси бўлиб фаолият бошлагандан кейин мазкур Низомнинг 13-бандида кўрсатилган мезонлар бўйича шахсий ривожланишида эришган натижалари асосида қайта кўриб чиқилади.

19. Танловнинг туман (шаҳар) саралаш босқичида ғолиб бўлган етакчилар танловнинг ҳудудий саралаш босқичида иштирок этишга йўлланмани, ҳудудий саралаш босқичида 1-ўринни эгаллаган етакчилар танловнинг республика финал босқичига йўлланмани қўлга киритади.

20. “Йилнинг энг намунали маҳалла ёшлар етакчиси” танловининг ҳудудий босқичларини ташкил этиш ва ўтказиш бўйича комиссиялар умумий йиғилиши баённомасининг қарори билан танловнинг республика финал босқичида иштирок этишга йўлланмани қўлга киритган етакчиларнинг рўйхати расмийлаштирилади ҳамда Ташкилий кўмигага тақдим этилади.

21. Танловнинг республика финал босқичининг якуний натижалари Ташкилий кўмига қарори билан расмийлаштирилади, бунда ғолиблар ва совриндорлар рўйхати илова қилинади.

3-боб. Танлов ғолиблари ва совриндорларини тақдирлаш

23. Барча йўналишлар бўйича танловнинг туман (шаҳар), ҳудудий саралаш ва республика финал босқичларида 1-ўринни эгаллаган етакчилар ғолиб, 2 ва 3-ўринни эгаллаган етакчилар совриндорлар ҳисобланади.

24. Барча йўналишлар бўйича танловнинг ғолиб ва совриндорлари:

а) туман (шаҳар) саралаш босқичида:

1-ўрин учун – Ўзбекистон Республикаси Ёшлар сиёсати ва спорт вазирлигининг I даражали дипломи ва кейинги босқичда иштирок этиш йўлланмаси билан;

2 ва 3-ўрин учун – Ўзбекистон Республикаси Ёшлар сиёсати ва спорт вазирлигининг Фахрий ёрлиғи билан;

б) ҳудудий саралаш босқичида:

1-ўрин учун – Ўзбекистон Республикаси Ёшлар сиёсати ва спорт вазирлигининг I даражали дипломи ва кейинги босқичда иштирок этиш йўлланмаси билан;

2 ва 3-ўрин учун – Ўзбекистон Республикаси Ёшлар сиёсати ва спорт вазирлигининг Фахрий ёрлиғи билан тақдирланади.

Танловнинг республика финал босқичи ғолиб ва совриндорларини тақдирлаш, шу жумладан, моддий рағбатлантириш тартиби ва миқдорлари Ташкилий қўмита томонидан белгиланади.

25. Танловнинг республика финал босқичи ғолиблари қуйидаги имтиёзларга эга бўладилар:

юқори лавозимга тайинлаш учун кадрлар захирасига киритиш;

ривожланган хорижий давлатларнинг соҳага оид таълим ташкилотларига малака оширишга юбориш;

давлат мукофотларига тавсия қилиш.

4-боб. Шикоятларни кўриб чиқиш тартиби

26. Танлов натижаларидан норози бўлган етакчилар натижалар эълон қилинган кундан бошлаб **уч кун давомида** апелляция комиссияларига апелляция шикояти бериш ҳуқуқига эга.

Апелляция шикояти **беш кун ичида** кўриб чиқилади.

27. Танловнинг туман (шаҳар) ва ҳудудий саралаш босқичи апелляция комиссиялари тегишлича маҳаллаларда ёшлар билан ишлаш масалаларини мувофиқлаштириш бўйича маҳаллий ва ҳудудий комиссия раислари, республика финал босқичи апелляция комиссияси – Ўзбекистон Республикаси ёшлар сиёсати ва спорт вазирининг биринчи ўринбосари – Ёшлар ишлари агентлиги директори томонидан ташкил этилади.

Апелляция комиссиялари таркибига танлов комиссиялари фаолиятида иштирок этмаган шахслар киритилади.

28. Танлов натижаларидан норози бўлган етакчиларнинг апелляция шикоятини кўриб чиқишда уларнинг ўзи ҳам иштирок этиши мумкин.

29. Апелляция комиссиялари етакчиларнинг апелляция шикоятини кўриб чиқиб, натижаси бўйича аризани қаноатлантириш ёки рад этиш тўғрисида қарор қабул қилади.

5-боб. Яқунловчи қоидалар

30. Ушбу Низомни қўллашда юзага келадиган низолар қонунчилик ҳужжатларида белгиланган тартибда ҳал этилади.

31. Мазкур Низом талабларининг бузилишида айбдор бўлган шахслар қонунчилик ҳужжатларига мувофиқ жавоб берадилар.

“Йилнинг энг намунали маҳалла ёшлар етакчиси”
танловини ташкил этиш ва ўтказиш
тартиби тўғрисидаги нозимга
илова

“Йилнинг энг намунали маҳалла ёшлар етакчиси” танловини ўтказиш
СХЕМАСИ

Босқичлар	Субъектлар	Тадбирлар	Бажариш муддатлари
1-босқич	Ташкилий қўмита	Танлов ўтказилиши тўғрисида Ёшлар ишлари агентлигининг расмий веб-сайти ва ижтимоий тармоқлардаги саҳифларида эълон беради.	Сентябрь ойи давомида
2-босқич	Маҳалладаги ёшлар етакчилари	Ёшлар ишлари агентлигининг расмий веб-сайти ёки ижтимоий тармоқлардаги саҳифалари орқали танловда иштирок этиш учун рўйхатдан ўтади.	Ҳар йили 5 сентябрдан 30 сентябрга қадар
3-босқич	Худудий комиссия (<i>туман (шаҳар) ва худудий саралаш босқичи</i>)	1. Танловнинг туман (шаҳар) ва худудий саралаш босқичини ўтказди. 2. Худудий саралаш босқичи натижалари бўйича етакчиларни танловнинг республика финал босқичида иштирок этишга тавсия этиш тўғрисида қарор қабул қилади. 3. Худудий саралаш босқичи ғолиб ва совриндорларнинг умумлаштирилган рўйхатини тузади ҳамда Ташкилий қўмитага тақдим этади.	Ҳар йили октябрь- ноябрь ойларида
4-босқич	Ташкилий қўмита (<i>республика финал босқичи</i>)	1. Танловнинг худудий саралаш босқичида ғолиб ва совриндор бўлган етакчилар ўртасида белгиланган шартлар бўйича синовлар ўтказди. 2. Тўпланган балларни кўшиш орқали ҳар бир етакчининг якуний баллари йиғиндисини ҳисоблайди. 3. Баллар йиғиндиси якунига кўра йўналишлар кесимида ғолиб ва совриндорларни аниқлаш.	Ҳар йили декабрь ойининг биринчи ўн кунлигида
5-босқич	Ташкилий қўмита	Танловнинг ғолиб ва совриндорларини тақдирлайди.	Ҳар йили декабрь ойида

Вазирлар Маҳкамасининг
2023 йил “20” ноябрдаги 608-сон қарорига
2-илова

**“Йилнинг энг намунали маҳалла ёшлар етакчиси” танлови
ташкилий қўмитасининг
ТАРКИБИ**

1. А.И. Икромов – ёшлар сиёсати ва спорт вазири, *Ташкилий қўмита раиси*
2. А.З. Саъдуллаев – ёшлар сиёсати ва спорт вазирининг биринчи ўринбосари – Ёшлар ишлари агентлиги директори, *Ташкилий қўмита раисининг ўринбосари*
3. С.М. Бузрукхонов – олий таълим, фан ва инновациялар вазири ўринбосари
4. Д.М. Кенжаев – мактабгача ва мактаб таълими вазири ўринбосари
5. Б.М. Ахмедов – маданият вазирининг биринчи ўринбосари
6. Р.Э. Турдибоева – камбағалликни қисқартириш ва бандлик вазири ўринбосари
7. Д.А. Назармухамедов – ички ишлар вазири ўринбосари
8. *Лавозимига кўра* – Давлат хизматини ривожлантириш агентлиги директорининг биринчи ўринбосари (*келмув асосида*)
9. А.А. Жалилов – Ёшлар муаммоларини ўрганиш ва истиқболли кадрларни тайёрлаш институти директори
10. М.М. Хожиматов – Республика Маънавият ва маърифат маркази раҳбари
11. *Лавозимига кўра* – Ёшлар ишлари агентлиги директорининг биринчи ўринбосари, *Ташкилий қўмита масъул котиби*

Изоҳ. *Ташкилий қўмита аъзолари бошқа ишга ўтган тақдирда, уларнинг ўрнига ушбу лавозимга янги тайинланган ёки зиммасига тегишли функцияларни бажариши юкланган ходимлар киритилади.*

Вазирлар Маҳкамасининг
2023 йил “20” ноябрдаги 608-сон қарорига
3-илова

**“Йилнинг энг намунали маҳалла ёшлар етакчиси”
танловининг туман (шаҳар) босқичларини ташкил этиш
ва ўтказиш бўйича комиссияларнинг
НАМУНАВИЙ ТАРКИБИ**

1. *Лавозимига кўра* – туман (шаҳар) ҳокимининг ёшлар сиёсати, ижтимоий ривожлантириш ва маънавий-маърифий ишлар бўйича ўринбосари, *Комиссия раиси*
2. *Лавозимига кўра* – туман (шаҳар) ёшлар ишлари бўлими бошлиғи, *Комиссия раиси ўринбосари*
3. *Лавозимига кўра* – туман (шаҳар) прокурори (*келишув асосида*)
4. *Лавозимига кўра* – туман (шаҳар) ички ишлар бошқармаси (бўлими) бошлиғи
5. *Лавозимига кўра* – туман (шаҳар) муҳофаа бўлими бошлиғи
6. *Лавозимига кўра* – туман (шаҳар) мактабгача ва мактаб таълими бўлими бошлиғи
7. *Лавозимига кўра* – туман (шаҳар) маданият бўлими бошлиғи
8. *Лавозимига кўра* – туман (шаҳар) камбағалликни қисқартириш ва бандликка кўмаклашиш бўлими бошлиғи
9. *Лавозимига кўра* – туман (шаҳар) солиқ инспекцияси бошлиғи
10. *Лавозимига кўра* – Республика Маънавият ва маърифат маркази туман (шаҳар) бўлинма раҳбари
11. *Лавозимига кўра* – Ўзбекистон фахрийларининг ижтимоий фаолиятини қўллаб-қувватлаш “Нуроний” жамғармаси туман (шаҳар) бўлими раҳбари

Изоҳ. *Комиссия аъзолари бошқа ишга ўтган тақдирда, уларнинг ўрнига ушбу лавозимга янги тайинланган ёки зиммасига тегишли функцияларни бажариши юқланган ходимлар киритилади.*

Вазирлар Маҳкамасининг
2023 йил “20” ноябрдаги 608-сон қарорига
За-илова

**“Йилнинг энг намунали маҳалла ёшлар етакчиси” танловининг ҳудудий
босқичларини ташкил этиш ва ўтказиш бўйича комиссияларнинг
НАМУНАВИЙ ТАРКИБИ**

1. *Лавозимига кўра* – Қорақалпоғистон Республикаси Вазирлар Кенгаши Раисининг, вилоятлар ва Тошкент шаҳар ҳокимларининг ёшлар сиёсати, ижтимоий ривожлантириш ва маънавий-маърифий ишлар бўйича ўринбосарлари, *Комиссия раиси*
2. *Лавозимига кўра* – Қорақалпоғистон Республикаси, вилоятлар ва Тошкент шаҳар ёшлар ишлари бошқармалари бошлиқлари, *Комиссия раиси ўринбосари*
3. *Лавозимига кўра* – Қорақалпоғистон Республикаси, вилоятлар ва Тошкент шаҳар прокурорлари (*келишув асосида*)
4. *Лавозимига кўра* – Қорақалпоғистон Республикаси ички ишлар вазири, Тошкент шаҳар, Тошкент вилояти ички ишлар бош бошқармалари ва вилоятлар ички ишлар бошқармалари бошлиқлари
5. *Лавозимига кўра* – Қорақалпоғистон Республикаси, вилоятлар ва Тошкент шаҳар муҳофаза ишлари бошқармалари бошлиқлари
6. *Лавозимига кўра* – Қорақалпоғистон Республикаси мактабгача ва мактаб таълими вазири, вилоятлар ва Тошкент шаҳар мактабгача ва мактаб таълими бошқармалари бошлиқлари
7. *Лавозимига кўра* – Қорақалпоғистон Республикаси маданият вазири, вилоятлар ва Тошкент шаҳар маданият бошқармалари бошлиқлари
8. *Лавозимига кўра* – Қорақалпоғистон Республикаси камбағалликни қисқартириш ва бандлик вазири, вилоятлар ва Тошкент шаҳар камбағалликни қисқартириш ва бандлик бошқармалари бошлиқлари
9. *Лавозимига кўра* – Қорақалпоғистон Республикаси, вилоятлар ва Тошкент шаҳар солиқ бошқармалари бошлиқлари
10. *Лавозимига кўра* – Республика Маънавият ва маърифат маркази Қорақалпоғистон Республикаси, вилоятлар ва Тошкент шаҳар бўлимлари раҳбарлари

11. *Лавозимга кўра* – Ўзбекистон фахрийларининг ижтимоий фаолиятини қўллаб-қувватлаш “Нуроний” жамғармасининг Қорақалпоғистон Республикаси, вилоятлар ва Тошкент шаҳар бўлимлари раислари

Изоҳ. *Комиссия аъзолари бошқа ишга ўтган тақдирда, уларнинг ўрнига ушбу лавозимга янги тайинланган ёки зиммасига тегишли функцияларни бажариши юкланган ходимлар киритилади.*

